

# Anvan ou pran prè pou etidyan pou tèt ou oswa pou yon pitit

Fason ou finanse edikasyon siperyè *kounye a* ka afekte ou finansyèman pandan plizyè ane. Sèvi ak konsèy sa yo pou ede ou avèk desizyon finansman ou yo.

## Ranpli Aplikasyon Gratis pou Èd Etidyan Federal (Free Application for Federal Student Aid, FAFSA) la chak ane ou gen plan ale lekòl.

FAFSA a detèmine ki pwogram asistans federal, eta, ak lekòl ak prè etidyan ou kalifye pou resevwa, tankou Pell Grant ak Pwogram Asistans ak Frè Lekòl (Tuition Assistance Program, TAP) Eta New York. Kèk pwogram, tankou **sibvansyon**, bay lajan pou peye frè lekòl ou pa bezwen remèt. Men, pou yon **Prè**, w ap bezwen remèt li ak enterè. Ale sou sitwèb [studentaid.gov/h/apply-for-aid/fafsa](http://studentaid.gov/h/apply-for-aid/fafsa).

**Enpòtan:** Toujou konsidere pwogram asistans ak prè federal *anvan* ou al prete nan konpayi prive. Prè etidyan federal la gen plis pwoteksyon pou moun ki prete a epi jeneralman li gen yon to enterè ki pi ba. Ou dwe ranpli FAFSA a pou kalifye pou prè etidyan federal.

## Li lèt ofrann èd finansye ou a ak anpil atansyon.

Anpil lekòl ap voye w yon lèt pou ofri ou èd finansye — souvan yo rele yo yon "Lèt Rekonpans" — lè yo aksepte ou nan lekòl la. Li enpòtan pou w li lèt sa a ak anpil atansyon pou w konnen kisa y ap ofri a ak sa w ap gen pou peye pou edikasyon ou. Souvan "èd la" se yon melanj ak sibvansyon, prè ak pwogram travay-etid (lajan ou ka touche nan travay a tan pasyèl kalifye ak lekòl la). Lèt la kapab masyone prè opsyonèl tankou prè Parent PLUS, paran ou pral gen pou remèt. Chak kalite prè gen yon to enterè diferan ak diferan opsyon pou anile li. Sa vle di, kèk prè ofri pi bon dil pase lòt.

## Konprann risk ki genyen nan prè Parent PLUS yo.

**Si ou pran yon prè Parent PLUS pou yon timoun, w ap gen pou kòmanse peye kou yo bay lajan an, amwenske ou mande pou mete li pou pita.** Si ou mete li pou pita, enterè pral fè pil sou prè a epi peman ou yo pral pi wo lè ou kòmanse peye. Si ou pa kapab peye pandan pitit ou a enskri nan lekòl la, pitit ou a gendwa pa ka enskri pou klas. Prè Parent PLUS yo pa vini ak menm plan ranbousman ki baze sou revni lòt prè etidyan federal yo ofri yo.



Si ou aplike pou yon prè Parent PLUS, pretè yo pral verifye kredi ou. Nenpòt peman ou fè oswa ou pa fè pral afekte kredi ou. Si ou pa peye, yo ka sezi salè ranbousman taks, ak peman Sekirite Sosyal ou.

Ou pa kapab transfere prè Parent PLUS ou bay pitit ou. Se paran an ki responsab pou remèt lajan an.

## Konnen konbyen w ap bezwen prete epi pa aksepte plis pase montan sa a.

Kreye yon bidjè pou detèmine kantite prè ou pral bezwen an ak konbyen ou panse w ap ka peye apre gradyasyon. Eseye Kalkilatrè Prè FinAid la nan [finaid.org/calculators/loanpayments](http://finaid.org/calculators/loanpayments).

Yon règ senp se pa prete plis pase sa ou panse ou pral ka peye chak ane nan premye ane ou apre gradyasyon. Pafwa, pretè yo ap ofri ou plis pase sa ou bezwen pou peye pou edikasyon ou. Ou pa oblije aksepte yon pi gwo montan. Lè ou prete twòp sa vle di ou pral bezwen peye plis enterè alalong.

## Mande pri epi konpare prè etidyan prive yo sèlman apre ou te itilize tout prè etidyan federal, pwogram travay-etid, bous ak sibvansyon.

Pale ak plizyè pretè epi konpare akò yo pou wè kiyès ki pi bon pou ou. Prè etidyan prive yo ka gen plis enterè pase prè etidyan federal yo; yo ka mande pou w kòmanse peye pandan ou deja lekòl; epi ou ka gen plis enterè ki varye, ki vle di yo ka ogmante apre yon tan. Plis nòt kredi ou wo — ak pa moun k ap siyen ak ou a si ou chwazi youn — to enterè a ap pi ba. *Remak:* Moun ki siyen ak ou a ap responsab pou peye dèt la si ou pa peye prè a.

Konpare frè yo, ki ka ogmante pri pou yon prè, epi fè li pi chè. Konpare dire prè yo tou — kantite ane li pran pou fin peye dèt la. Jeneralman plis dire a long, se plis ou pral peye.



## Pa janm siyen okenn bagay ou pa konprann.

Si yon lekòl ba pou presyon pou ou siyen yon kontra oswa akò menm lè a, jete w. Toujou pote fòm enpòtan yo lakay ou pou ou kapab li yo avèk anpil atansyon epi revize yo ak moun ou fè konfyans.

## Pa bliye konsidere alontèm.

Yon pwogram degre bachelarye tipik pran kat (4) a sis (6) ane pou fini, epi gen yon limit sou konbyen lajan ou ka prete nan prè etidyan federal. Asire ou w ap kapab peye frè lekòl la ak depans pou viv pandan tout tan li pran pou w fini ak pwogram nan. Kenbe nan tèt ou èd yo ofri yo gen tandans pi wo pandan premye ane a epi li ka bese pita.

Si ou panse ou ka bezwen pran klas ratrapaj, konsidere CUNY Start, ki bay preparasyon pou inivèsite entansif pou yon bon pri. Ale sou sitwèb [www1.cuny.edu/sites/cunystart](http://www1.cuny.edu/sites/cunystart).

Epitou asire ou w ap ranbouse prè a lè ou gradye. Sof pou ka ki ra, yo p ap anile prè etidyan menm si ou fè fayit.

## Fè atansyon pou w pa pran twòp dèt.

Asire w ou konprann kondisyon nenpòt prè epi w ap ka peye li. Se menm bagay la pou paran ou yo si yo anvizaje prè Parent PLUS federal oswa yo vle siyen ak ou pou prè etidyan prive. Yon prè ka bese nòt kredi ou si ou pa remèt yo a tan, epi jeneralman yo p ap anile prè etidyan menm si ou fè fayit. Si ou gen yon dèt prè etidyan ou pa peye, konpayi ki kolekte dèt yo ka mennen ou nan tribinal, epi si yo genyen yo ka sezi salè ou epi plase yon chaj kont pwopriyete ou. Si ou gen dèt prè etidyan ou pa peye yo ka sezi salè ou, ak sezi ranbousman taks oswa peman Sekirite Sosyal ou yo.

## Konnen dat pou w kòmanse peye a pou w pa rate okenn peman.

Prè etidyan federal ak kèk prè etidyan prive pèmèt ou mete dat peman yo pou pita pandan ou lekòl ak pou sis (6) mwa apre gradyasyon. Yo rele sa yon peryòd gras. Kèk prè, tankou prè Parent PLUS, mande pou w peye kou yo ba w lajan an. Gade seksyon sou prè Parent PLUS la.

**Enpòtan:** Kèk prè, tankou prè federal *ki pa sibvansyone*, ka akimile enterè pandan ou lekòl ak pandan peryòd gras la. Prè *sibvansyone* yo pa akimile enterè pandan ou lekòl oswa pandan peryòd gras la.

## Èd Gratis

**Jwenn èd gratis pou ranpli Aplikasyon pou Ed Etidyan Federal (FAFSA) ak College Goal NY**

Ale sou [collegegoal.ny.gov](http://collegegoal.ny.gov) pou jwenn lis kote evènman yo ye.

**Jwenn konsèy finansye pwofesyonèl gratis nan yon Sant Otonomi Finansyè Vil New York**

Pou fè yon randevou: Ale sou sitwèb [nyc.gov/TalkMoney](http://nyc.gov/TalkMoney) | Rele 311

Depatman Pwoteksyon Konsomatè ak Travayè ki jere Sant Otonomi Finansyè Vil New York yo nan yon patenarya ak òganizasyon kominotè yo. Konseye yo kapab fè referans bay founisè sèvis jiridik ki pa pou fè pwofi, jan sa nesèsè tou.

## Resous

**College Board:** [bigfuture.collegeboard.org/pay-for-college/financial-aid-awards](http://bigfuture.collegeboard.org/pay-for-college/financial-aid-awards)

**College Navigator:** [nces.ed.gov/collegenavigator](http://nces.ed.gov/collegenavigator)

**College Scorecard:** [collegescorecard.ed.gov](http://collegescorecard.ed.gov)

**Biwo Pwoteksyon Finansyè Konsomatè (Consumer Financial Protection Bureau, CFPB):** [consumerfinance.gov](http://consumerfinance.gov)

**Èd Federal Etidyan (yon pati nan Depatman Edikasyon Etazini):** [studentaid.gov](http://studentaid.gov)

**Asosyasyon Nasyonal pou Konsèy Admisyon nan Inivèsite:** [nacacnet.org/student](http://nacacnet.org/student)

**Kòporasyon Sèvis Edikasyon Siperyè (Higher Education Services Corporation, HESC) Eta New York:** [hesc.ny.gov](http://hesc.ny.gov)

**Depatman Edikasyon Ameriken:** [studentaid.gov/understand-aid/types/loans/federal-vs-private](http://studentaid.gov/understand-aid/types/loans/federal-vs-private)